

Dhidar iyo Dhurwaa iyo Ri' Dhaaqo ah(Gabay)

Gabaygan waxaa tiriyey Abwaan Jaamac Nuux Cawdgale, oo ah gabyaa ay iska dhaleen labo gabyaa. Aabbihiis Xaji Nuux Muse iyo Hooyadiis Bullo, labadooduba way gabyi jireen , isaguna Abwaannada gobolladan caanka ka ah ayuu safka hore kaga jiraa.

Markii ciidamadii u dagaallamayey maxaakiimta laga saaray gobollada jubbooyinka 02/01/07, oo ahayd goobtii ugu danbeysey ee ay ciidan ahaan uga baxeen ayuu Abwaanku curiyey gabaygan oo cinwankiisu ahaa Dhidar iyo Dhurwaa wuxuuna ku bilaabanayey sidan:-

- | | |
|-------------------------------|-----------------------------|
| 1) Dhidar iyo Dhurwaa-baa | Wax dhexmaray Ri' dhaaqa ah |
| 2) Hadba kii dhaqaaqay | Dhinciisa raacdaa |
| 3) Midna xoolo dhaqashiyo | Kama rabo dhaqaalee |
| 4) Dhabetu waa inuu cuno | Dabadeed Dhurwaagii |
| 5) Waa dhaartay oo yiri | Dhidar may maqlaysaa |
| 6) May dhegaysanaysaa | Dhab ma ii taqaannaa |
| 7) Dhutintaad arkaysaa | Dhib i gaarey maahee |
| 8) Waa dhalashadii hore | Maxaan reer u soo dhacay |
| 9) Ka dhawaajey leykii | Ka dhexkacay baraarkii |
| 10)Goortaan la dhaadhacay | Ku dhimo ay yiraahdeen |
| 11)Dhegcas dhogor baraar-liyo | Dheereeye Faras iyo |
| 12)Ma dhaafaanka Geelaan | Ka dherгаа anoon dhigin |
| 13)Adna Caalle dhidaroo | Dhaandhaana baad tahay |
| 14)Aniguna Dhurwaa aan | Dhirtu waabin baan ahay |
| 15)Horta maysu dhigannaa? | Waa inaad is dhiibtaa!!! |
| 16)Dhidarkii xanaaq-buu | Dhudhumada is dhaafsaday |
| 17)Sarraxuu ka dhigay Geed | Dadabadana dhulkuu dhigay |
| 18)Wuxuu yiri Dhurwaayow | Dhegta wayga maqashaye |
| 19)Dhab ma ii taqaannaa? | Maxaan Ari dharaartii |
| 20)Dhawr qof ay la jooheen | Lasoo dheelmay galabtii |
| 21)Xerodhaafay fiidkii | Isago dhooban meel dul ah |
| 22)Intaan dhinac kasoo galay | Orgi dhaawac kaga tegey |
| 23)Intii kale halkaas dhigay | Arigaan dhabbada dhigo |
| 24)Horta maxaad ku dhaantaa? | |
| 25)Haddii laysku dhiiddhiyey | Dhanaanaadey Xaalkii |
| 26)Ninba dhoonbirkiisuu | Soo dhexdhigay rasaastii |
| 27)Markay dhawr ayaamood | Xabbaduhu dhacaayeen |
| 28)Dhimashadu ma meel dayan | Dhaawacana warkii daa |
| 29)Hadal iyo Dhammaantiis | Dhidarkii baquu galay |

- 30) Ri'dii dhaaqada ahayd
31) Waase wuxu ka dheefaa.!!!

Wax u haray Dhurwaagii

Waxaa gabaygaasi ka jawaabey MMX (Gaani)_ oo Abwaan Jaamac Nuux Cawdgale Abti u yahay, Maalmo sagaal ah marii dawladdu Xamar joogtey wuxuuna ku bilaabay sidaan:

- | | |
|-------------------------------|---------------------------|
| 1) Abti dheeshi hore ee | Dhidarkiyo Dhurwaagii |
| 2) Waxay joogtey Dhidarkii | Oo dhoonbirkiisii |
| 3) Kula dhuuntay Duurkoo | Ridii dhaaqada ahayd |
| 4) Uga tegey Dhurwaagii | |
| 5) Markuu dhawr ayaamood | Dhamacдии rasaastiyo |
| 6) Dhawaaqeedi moogaa | Ayuu soo dhaqaaqoo |
| 7) Isagoo dhirfaayoo | Dhabbadiisa haystaa |
| 8) Dhagar hooyadeed iyo | Dawaco u dhawaaqdo |
| 9) Tiri caalle Dhidarow | Xaggaw dhabacsanaysaa? |
| 10) Wuxuu yiri dhallaan iyo | Dhal baa layga laayoo |
| 11) Ri' baa layga dhacayoo | Dhurwaa baa i helayoo |
| 12) Dhirbaaxadi i gaartana | Dhegahay qablamayee |
| 13) Cabbaar baan dhakinayaa!! | |
| 14) Dhagar badan Dawacadii | Dhidaryohow waxay tiri |
| 15) Dhiirran hooyaday baa | Igu tiri dhashiisiyo |
| 16) Ogow Dhidarku waa doqon | Waqaa yay ku dhinac marin |
| 17) Anigana Dhab inay tahay | Dhareerkaad qubaysiyo |
| 18) Dhaayahay markhaantiya | Waxyohow dhaystaweyn lihi |
| 19) Dhabankiyo wejiga iyo | Dhafoorkaaga kama arag |
| 20) Dhibi inay ku gaartaye | Dhidarow maxaa dhab ah? |
| 21) Dhibbanaha sidaada ah | Dhinac inu u seexdiyo |
| 22) Jiif uma dhadhamayee | Ma fal baa lagu dhigay |
| 23) Maxay tahay dhabcaalyohow | Cabbaar baan dhakinayaa? |
| 24) Dhidarki wuxuu yiri | Deyooy dhiirrigelintiyio |
| 25) Dhiilladaad i gelisaa | Dhogortayda kicisee |
| 26) Dhabbo igu tilmaanoo | Ma dhaafaanka talada ah |

- 27) Isii aan dhaqaaqee
- 28) Waxay tiri dhakhsaba soco Adigoon doc kale dhugan
29) Dhurwaaga iyo dhaaqada Dhexdoodii fariisoo
30) Dhufeysyaal ka soo qodo Sido dhoonbir- kaagana
31) Doorri dhalanka kaaga ah Maalintii dhurwaa noqo
32) Ha illaawin dhutintana Habeenkiina dhidar noqo
33) Dhulka oo dhan miinee Yaan cidi ka dhaansane
34) Dhaab ceelashoo idil Dharaar ama habeenkii
35) Rasaastii dhashiikaha Dhan walababa isaga tuur
36) Qaar aan wax dhimin iyo Dhurwaagii laftiisiyo
37) Dhaaqada Ri'da ah iyo Dhirta bilicda wacan iyo
38) Wax kastoo dhawaaqiyo Dhimashada ha xaalayn
39) Ha u joojin dhawdhaw Dhimbil lagugu soo ridey
40) Madfacyada dhawaaqana Yay dhegaha nooluhu
41) Moogaan dharaar qura Isbaarooyin dhigashada
42) Dhiirrigeli dan weeyee Dhaca iyo xatooyada
- 43) Dharaar iyo habeen fuli
- 44) Dhib hadday dareentoo Ri'dii dhaaqada ahayd
45) Dhawaaqeedu kuu baxo Warka yaadaddo u dhiib
46) Dheh-na waxad tiraahda Haddaan anigu Dhidar ahay
47) Dhurwaa iyo Dhurwaa-kaal Iyo soo dhoweystiyo
48) Wanka dhogorta weynee Dhexdhexaadka sheegtiyo
49) Dhiidhiya badatiyo Daayer dhalaandhuux
50) Dhacadiid ku cuna iyo Dhiilow-yahanka qayshaba
51) Midna dhaafimaayee Waa dhibib tiraayaa
52) Waxa haatan dhacayiyo Dhismayaasha dumay iyo
53) Dhimashadana kama xumi Rasaastaas dhacaysana
54) Anigiyo dhurwaaguba Ways dhaafsanaynaye
55) Keligay maxaan dhimay Cadligii miyaa dhumay?
56) Dhuundhuumashada iyo Sida dhaaqo loo dago
57) Cidi kuguma dhaantee Iyadoo dharaaroo
58) Cidiba aanay dhaadayn Cadow maalin soo dhaca
59) Ridii dhaaqada ahayd Dhudhumada ka jebiyoo
60) Ubucdeeda dhaawacan Ha arkeen dhallaankuye
61) Wargeysyada halagu dhigo Dhallintiiyo magaratada
62) Ugu sheeg dhurwaagaa Dhaawacay Ri'diini
63) Illaa hilib ma dhaafee!!
64) Haddaad talo dhaguug tahay Biyo kama dhibcaankaas
65) Iga qaado dhidaroo Haddii kale i dhaafoo

- | | | |
|-----|-------------------------|-------------------------|
| 66) | Dhacadiid halkaagaas | Ilaa lagugu soo dhego |
| 67) | Dhidarki wuxuu yiri | Talo dhaxal galoo culus |
| 68) | Oo lagu dhaqaaqiyo | Dhabbaad ii tilmaantaye |
| 69) | Dhakhso inan u raaciyo | Fulinteeda ii dhaaf |
| 70) | Wuuna soo dhaqaaqoo | Dhufeysyaal samays iyo |
| 71) | Falal dhimasha keeniyo | Ceelashoo la dhaabiyo |
| 72) | Dhib ay wada dareemeen | Dhaaqadiyo Dhurwaagii |
| 73) | Ayuu geystey dhidarkii | Balse waxaynu dhawrnaa |
| 74) | Dharaaraha Rimmani waxa | Ay dhali dhowaan iyo |
| 75) | Dhurwaagiina wuxu falo | Hadal iyo Dhammaantiis |
| 76) | Kama sii hordhacayee | Abti dheeshu waa kow |

MMX Gaani 755782

Gabayadii hore markay is dhaafsadeen Abwaaniinta kala ah Jamac Nux Cawdgale iyo MMX Gani, ayaa waxa soo galay sida caadada suugaantu tahay Abwaan saddexaad oo ah Abwaan

Saalax Xaashi Carab oo ku sugan Magaalada Jabbuuti ee ah Caasimadda dalka Jabbuuti.
Abwaan Saalax isaga waxay ugu muuqatay inaan Ri'du dhaaqo ahayne raggii dhaqan jirey
hagraday oo baday inay bahalo weheshato.

Abwaan Saalax wuxuu tixdiisa ugu yeerayaa Abwaaniinta kala ah Jaamac Kediye, Ahmed Farax
Cali -Idaajaa, Axmed Sh Jamac C/Qadir Cabdi Shube, Xasan Ganey, Hurre Walanwal, Cabdi
Muxumud Ammiin iyo Bacadle, isagoo leh Raggaas ayay ahayd inay dhacan aan dhawrtu u
soomarin u dhigaan Ri'da.

Abwaan Saalax XAASHI Labadii maanso ee hore wuxuu ula kala baxay Dhidarley
Dhurwaayaley oo Tii hore uu u bixiyey iyo tii Labaad oo uu ula baxay Biyo kama dhibcaan,
isagoo tixdiisana ugu wanqalay DHIMRIS. Abwaan Saalax wuxuu ku bilaabay sidan:

DHIMRIS

Jaamacow Dhurwaayaley
Dhidarley tixdii aad
Dhexdhexaadka ka ahayd
Oy dhinacca kaga tiil
Abtinnimo isdhawr iyo
Dhiirrani u doodkiyo
Gaanni tuu ka dhiibtoo
Dhigan oo qoraalaa
Dhambaalkoodu noo yimi!

Dhowaano ba in bahalladu
Dhawaaqoodu baxayoy
Aadmigii dhaxleen oo
Dhoollatusad ahaayeen
Nin dhug laa ogaayoo
Dhuganaayey xaalkoo
Qayladay dhigaysiyo
Ri'dan dhimanla' alalkeed
Qalaadkeedu dhibayee,
Waxse aan horuu dhicin
Oo dhiffa u dhigankeed
Sidaad dheehashada guud
Dhidarley Dhurwaaley
Dharkii ay lahaydiyo
Dhuuga ugu marriintoo
U dhigaandhigtoo wacan!

Dhab waxaad u baratood
Dhaqankooda badisaan
Faalladood ku dhibin oo
Tilmaantaad ka dhiibtaa
Badi dhaxalgal noqotee
Tayda aan u dhaadhdhaco

Una dhuujo dhexxirkoo
Aan idhaahdo dhaqayiyo
Ri'du daaqo maahee
Way soo dhuntoo kayn
Laga kala dhaqaaqiyo
Dhawrtaa diloodtoo
Dhoylaawe sheegtiyo
Raggii dhaqanjiraw kaday
Inay dhogorxumaadtoo
Nabsi baa halkaa dhigay!

Waxay dayadtay dhabarrada
Intii fiiri dheerida
Laga dheeganjirey oo
Kolka Ganey¹ dhaqaalkeed
Aqoon uu ku dhaaboo
Xalka uu u dhaadhdhaco,
Oo Bacadle² dhicinteed
Dhabbada uu u xaadhoo
Dhagaxyada ka wada guro,
Axmeddadu³ na DhuuxGorad
Dhankay ugu danbaysiyo
Cudurkay u dhimadtiyo
Waxxa dhacay wixxii dhigay
Kolkay kala dhigdhigideed
Runta ay ka dhiibtaan,
Oo Hurroo⁴ ku dhaadtoy
Beri dheemman la ahayd
Ku dhiirrado tusmayntiyo
Inuu dheelsha soo galo,
Cabdi⁵ baa ku dhacayee
Waxa ay dhibsanaysoo
Dhiman goorta uu sugo,
Oo Jaamac⁶ dhacantaye
Dhab u dooniddeed baaq
Hees uu ku kala dhigo,
Oo Shube⁷ dhal aan korin
Bista dhaaxo uu wado
Dheelmintooda dhaafoo
Raadsho tii dhalshoo maqan,
Kolkay dhammi abwaannadu
Dhinac walba ka eegaan
Waan hubaa dhaqaalayn
Inay garadyo-dhaadyadu
Isla dhigi karaan meel
Sida ri'datan loo dhaqo

Dugaag looga dhiciyoo
Looga liso shan dhiil iyo
Dhigto weli ba sii taal!

Dhudda kale Garaadow
Jaamacow tusmayn dhiman
Oy malaha dhidarkiyo
Dhurwaagu ba qarsanayeen
Baanaha ka dhaafeen
Runta aan ku dhaaboo
Aan ku soo dhowaadee,
Siday badi dhakhaatiir
Rogid dhalanka badiyaa
Xaqiiqada u dhigayaan
Dhidarku maaha dhidarkii
Dhulka joogi jirey oo
Dadku dhaqanyiqiin oo
Muuqshabeelku waa dhicis
Dhegadhheere iyo yey
Isku danqaqamaa dhalay!

Dhabtu inay sidaa tahay
Runta ay u dhowdahay
Hooyadii ka dhogor badan
Aabbihii na dhabarkiyo
Jiifaa ka dhega'weyn
Wuu dhafoorro godanyahay
Dhowaan aragga mooyee
Dhaayihisu eegmada
Ma arkaan wixii dheer,
Dhaleecada intaasuu
Ku darsaday dhabcaalnimo
Iyo cadho dhowaanoo
Caallaha ka dhirif badan
Waa macangag dhega'adag
Ma dhergaa la yidhi badi!

Nin hubaa siduu dhigay
Dhalanrogaan baxaalliga
Wuxuu bahalo dheeryahay
Kuma dhaadto weerkiyo
Dhaqammada bahdiisoo
Dhulukhdhaalukh waa keli
Dhab aan loo aqoon weli!

Teeda kale na dhabarow

Firka dhalad ahaanshaha
Sow ma ogin dhurwaagiyo
Waraabaha dhidtiqshaa
Dhawr jaad inuu yahay
Dalxow uu la dhalanyahay
Oy dhoyla'aantiyo
Dhuxtinta ba wadaagaan!

Ragga hadal-dhegeystaa
Dhaaxo waxay yidhaahdaan
Waa Jin-arag dhurwaayadu
Isagiyo dhalshiisiyo
Xooluhuu dhaqda ba cuna,
Dhaw ayuuna leeyahay
Dhigidtaanka faalkana
Loogama dhagsiisoo
Falka wuu ku dheeryahay!

Ma dhiirrana waraabuhu
Waxse uu ku dhaamaa
Bahallada dhiggiisa ah
Abaal dhigasho weeyoo
Raq dharaarta uu helo
Wuxuu ugu dhawaaqaa
Dhammi habardugaag oo
Wirix qosol dhaglayniyo
Qayladdhaanta goortuu
Dhammi kaalayaay yidhi
Bay soo dul dhoobtaan
Dhinacyada ka buuxshaan!

Jaamocow dhaliilaha
Ceebaha dhurwaayada
Lagu sheego dhammidood
Waxa debedda soo dhigay
Ayaamahan tan uu dhidar
Aqoonli'i dhegraaricin
U dhegaysanaayoo
Dhoohane ku maranyahay!

Dabadhdhilitu waa tii
Maalin uu dhalaal iyo
Dhaashi doonasho ahaa
Sheegkada dhigaalka leh
Tis dhurwaa dhigaa jirey,
Waxa jirey dharaar uu

Dhexfadhiistay qaxan iyo
Dhamac ay ka bood tidhi,
Dharbaaxada libaaxxii
Dhanka fujiyey waagii
Dhagarleydu iyadaa
Ka danbeysey dhagartoo
Ku dhawaaq codkii tidhi
Dhibaadtadu ka raacdo
Dhinbiluhu ka duuleen!

Dhagarley dhurwaa abid
Uma teella dhiganine
Tiisoon dhammaan iyo
Dhaax wuxuu ku bixijirey
Oogo dhalan'adkaantiyo
Dhirtuu kala yiqiinoo
Dhaawac goorta uu yahay
Dhaymo uu ka heli jirey!

Dhurwaa iyo anoon dhidar
Midna dhinacca saarayn
Misna talo dhigaal lehe
Dhoohanaan ku odhanlaa
Fursaddii ku dhaaftiyo
Kansho kuuma dhigantee,
Hayska layn dhallaankiyo
Dhalshaadoon wax kuu dhimin
Dholo'dholo' kadlayntiyo
Maqal dhega'adkaantiyo
Dhuurrayn u socodkiyo
Dhaaxa dhaqansilloonaa
Uunka kaa dhexsaartee
Is dhawr oo cagaha dhigo!

Hadal iyo dhammaantiis
Dheelshani sidaan qabo
Waxa ay dhextaallaa
Intii dhiigqabeennada
Ugu dhaqanxumaayoo
Ma dhammaan karaysee,
Waxaan dhaabadayntay
Oodhanlaa dhurwaagani
Kol hadduu dhabiiltamid
Markan dhaqasho muujoo
Weli aan ri'dii dhiman
Dhakhso loogu kala tegin

Dhacdo weeye ugub oon
Ab'ogaa horuu dhicin
Oo u baahan dhawrniin
Dhimrin iyo sugaal mudan!

Ganey – Abwaan Xassan Ganey

Bacadle – Abwaan Bacadle

Axmeddo – Abwaan Axmed Faarax Cali “Idaajaa” iyo Abwaan Axmed Sh. Jaamac

Hurre – Abwaan Cismaan Ibraahim Warsame “Hurre walanwal – Abwaan Hadraawi walaalkii oo ka yar.

Cabdi – Abwaan Cabdi Muxumud Ammiin

Jaamac – Abwaan Jaamac Kediye

Shube – Abwaan C/qadir A Shube.

Saalax Xaashi Carab
17.03.2007, Jabbuuti